

Gmaajibiymaagoom Gchi-gimaanaang Canada, kina wiya wii-waabndang:

Ni'aak ndaawmi, nooch gegoo ezhtoojik waa-gnawaamjigaadek miinwaa waa-bzinjgaadek, Canadians, Quebec enjbaajik, kina gewe ensweyaan'gizjik Nishnaabek. Mzin'ignan ndizhbiyaanaanin n'gamwinan gewe, nmamaanjiinmi, waa-mzinaatesek ndizhtoonaa; nnagmami, waa-zhi-mmaanjiining ezhbiiyngik, etoojik ezhbiiygaadek wii-ginjgaadek...

Maanda nooch dnawa zhitooyaang, ndizhnoomaagena wanjbaayaang, dbendaagziyaang, ezhibmaadziyaang gewe. Nooch wiya waabndaan noondaan gewe maanda ezhtooyaang. Giishpin maanda bwaa-nan'kiiyaang, gaawii daa-naag-sinoo maanda nooch bebkaan kina ezhibmaadziyaang. Ndawendaag-ziwak maanda waa-nan'kiijik kina ngoji kwiinwaat bemaadzijik.

Gdigoom dash giinwaa Gchi-gimaanaang Canada en'kiijik, wii-bwaa-bgidnamek wii-gjibiiygaadek zhiwi North American Free Trade Agreement (NAFTA) zhibiiygaadek bgidnigoong maanda nooch gegoo dnawa wii-zhichgaadek, miinwaa wii-bwaa-bgidnigaazwaat ezhoonyaakaadngik maanda dnawa gegoo wii-miin'gaazwaat 'free trade deals'. Gbakwaakpiimi maanda ezhibmaadziyng geyaabi wii-tek, giwi oodi Hollywood miinwaa nooch wiya Gchi-mookmaan'kiing gechi-zhoonyaakaadngik maanda dnawa gegoo zhaagooj'igying.

Niibna gdeyaanaa ezhibgshki'ewziyng ge-maamiikwenjgaadegba. Gichi-gshki'ewzimi nooch ngoji, gaawii eta maanpii Canada, memdage go n'gamang zhibiiyng gewe nikeyiing. Na'ii maanda enjigshki'ewzing, gii-naaknigem aabdek wii-mdwewechgaadenik maanpii enjbaajik wanagmawniwaan mdwewechganing, zhoonyaa gewe gii-miin'gaazwak maanpii enjbaajik ezhbiiygejik, mzin'ignan gewe ezhtoojik. Maanda nikeyiing niigaan bwaa-naabngiba, gaawii maanda gdaa-zhibgshki'ewzi-siimi, gaa gewe daa-gii-waabnjigaade-snoo nooch ezhibmaadziyng ezhtooaat.

Niizhing temgat ge-zhichgengba: ga-kawaabndaanaa wii-bwaa-naadak maanda yaawying, maa dash gewe ga-bgidnaanaanik nooch ngoji gidkamik wii-zhoonyaakeng eta mekwendngik bezhgonong wii-zhibdaabndaming waa-zhichgaadek. Waasmawni-sab eshkam memdage nakaazam wii-waabndaweng ezchigaadek, miinwaa ni'aak dnawaa Google, Facebook miinwaa Netflix memdage nongo niibna gegoo ezhtoojik. Gnandwendaagzimi aabdek gegiinwi wii-aabjizhitooyng maanda nooch gegoo, wii-naadmawngidwaa gewe maanpii enjbaajik meznibiiygejik, negmajik, ezhbiiygejik gewe, wii-gkendaagok nooch etek kina ngoji gidkamik.

Shkwaach gii-zhaawaat Canada pii waa-aanjbiyaagdek maanda waa-daandwaat Canada miinwaa Gchi-mookmaan'kiing, gaawii gii-ndawend-ziinaawaa Canada wii-dbaadjigaadek n'gamwinan mzin'ignan gewe zhichgaadek, miinwaa gaawii gii-bgidna-ziinaa wii-naajtoowing giinwi gshki'ewziwin yaamang giinwi go wii-naaknigeyng maanda n'gamwinan mzin'ignan gewe nikeyiing gegoo. Nongo dash, Motion Picture Association of America miinwaa aanin gonda dnawa wiikji'aawaan Gchi-mookmaani-gimaan wii-bgidnindwaa wii-giishpnadoowaat maanda zhanda Canada ezchigaadek, wiinwaa wii-dbendmawaat. Kina ngoji gidkamik nsastaanaawaa gaawii maanda da-bgidnigaade-snoogba jizhiwebak. Aabdek ggetin gwii-wiikjitoonaawaa ezhib-

bmaadziying wii-bwaa-naadak, dbishkoo gewiinwaa Gchi-mookmaanang ezhi-wiikjiitoowaat gewiinwaa ezhi-bmaadziwaat wii-bwaa-naaddinik.

Gego ga-bgidnaa-siiwaak giwi wii-kwedweyaat wii-shkwaasek maanda exemption etek megwaa maanda n'gamwinan mzin'ignan gewe nikeyiing. Aabdek gga-mshkwaan'gidoonam maanda wii-bwaa-bbaamenjgaadek nanda trade treaties zhichgaadek.

Maanda NAFTA wii-aanjbiiyming dzhinjgaadek, enchiyaang maanda maajibiigan enoozwin'kaadngik, ndi-naanaanik Canada gchi-gimaanaang na'ii wii-zhichgeyaat:

- Wii-bwaa-bmigaadek zhiwi NAFTA megwaa etemgak cultural exemption, miinwaa wii-aanjbiiygaadek wi wii-dgobiiygaadek nongo en'kaazang waasmawni-sabiing wii-zhitoong chigaadek gewe zhiwi nooch wiya wii-waabndang.
- Wii-gziibiiygaadek gewe zhiwi bezhik ezhbiiygaadek NAFTA, bgidnigaazwaat Gchi-mookmaan'kiing wii-aazhtooweyaata giishpin Canada nakaazat cultural exemption.
- Wii-bgidnaa-sgwaa bkaan ngoji wenjbaanjin zaam niibna wii-dbendmanit maanpii cultural industries.

Maanpii Canada ezhi-bmaadzing – maanda nooch gego nweng, nooch ngoji gii-bi-nzikaayaat maanpii nongo debendaagzijik, miinwaa bebkaan zhizhwebak maanpii Canada – aabdek wii-gkendming miinwaa wii-bwaa-bgidnaming gegoo wii-zhiwebak maanpii arts miinwaa entertainment industry, wii-gkendaagok ezhi-bebkaanziying miinwaa gaa-bi-zhitoowaat Canadian, wemtigooshwak maanpii gewe kiing wenzkaajik. Ndi-naanaanik Canadian gimaak wii-bwaa-bmigaadek naaknigewnan begdingowaajin maanpii nooch gego ezhtoojik n'gamwinan mzin'ignan meznaatesing gewe wii-zhinoomaagewaata giinwi ezhayaaying ezhi-bmaadziying gewe. Aabdek wii-zoonggaabwimgak maanda ezhi-bmaadziying, gego maanda ga-webna-ziinaa.

Niinwi,